

Fräi Tribün

Qualitéitskiller an eise Schoulen

D'Schoul ass en zentralt Thema, well mir an a mat der Schoul e bedeienden Deel vun eiser Zukunft gestalten. Et geet jo ëm näischt anescht wéi ëm d'Zukunft vun deene Jonken, speziell ëm d'Virbereedung op d'Aarbechtswelt an op d'Liewen iwwerhaapt. Dofir ass et wichteg, datt d'Schoul qualitätsorientéiert ass.

Wéi zu Réiden den Atert-Lycée opgoung, dunn ass eng nei Schoul entstan mat ënner anerem dem Zil, déi Jonk besser ze betrieen, en differenzéierten Unterricht unzebidden, selbstänneg Schaffen ze fördern a kompetenzorientéiert ze bewäerten. Am Atert-Lycée ass den Enseignant net nëmme Formateur, hien ass och Beroder a Begleeder. De Lycée zu Réiden entwéckelt domat, wéi aner Schoulen och, eng pädagogesch Kultur, déi d'Qualitéit an de Mëttelpunkt stellt.

Eng qualitativ héichwäerteg Ausbildung gëtt leider all ze dacks a Fro gestallt. Zum Beispill duerch en iwwerdrivwene Mediekonsum. Dat ass nëmmen een ënner villen externe Qualitéits-



itskiller, déi d'Leeschtungskraaft vun de Schüler aschränken. Familiär Problemer, Indifferenz vun den Elteren oder Mobbing, dat sinn aner Facteuren, déi d'Qualitéit an eise Schoule belaaschten. An deem Kontext erlabe Ganzdagsschoulen déi Jonk besser z'encadréieren.

All Schoul soll no engem Konzept funktionéieren, dat e gesond Aarbechtswelt erméiglecht an d'Elterenaarbecht souwéi d'Fortbildung vum

Léierpersonal ënnerstëtzt. Dat ass och eng Exigence, déi de Lycée vu Réiden huet. Dëst alles kann ouni e grouse finanziellen Opwand ertuechen. Hei geet et vill manner ëm Suen, wéi ëm Responsabilitéiten, gudden Willen, Innovatioun, ëm ee Qualitéitsverständnis, dat de Léierprozess begënschtegt. Ouni e klort Konzept, ouni e präzis, motivéierend Leitbild, kann eng Schoulgemeinschaft an eng eidel Routine geroden, déi zum Qualitéitskiller gëtt.

D'Roll vum Enseignant ass och entscheidend. Seng Perséinlechkeet a seng Begeeschte- rung maachen aus, datt den Unterricht inter-

essant, innovativ an domat qualitativ wäertvoll gëtt. Vill Enseignante ginn dëser Ufuerderung gerecht. Déi, déi sech méi schwéier dinn oder no Jorzengten Déngscht ausgebrannt sinn, déi, déi méi mat soziale Problemer wéi mat pädagogesch-didakteschen Erausforderungen ze dinn hunn, all déi Enseignante brauchen Hëllef. Duerch e Coaching kann hei e neien Dynamismus entstoen. Mir kënnen eis keng demotivéiert Enseignante leeschten. Och dat ass qualitätsschiedegend.

De Schoulsystem reforméieren heescht also fir Qualitéit suergen. Eis Schoule mussen iwwersichtlech bleiwen. Si mussen och ee Milieu sinn, wou eng Kultur vun der Zesummegehéiregkeet gefleegt gëtt, sozial Déngschter gelescht ginn, wou all Partner sech wuel fillen a sou méi leeschten.

D'Schoul soll jo keng Maschinn sinn, déi just op materiell Ziler ausgeriicht ass. Si huet de ganze Mënsch auszebilden a Wäert op d'Allgemengbildung ze leeën. Dat misst eigentlech de roude Fuedem vun all Schoulpolitik sinn.

› André Bauler, Ierpeldeng/Ettelbréck